



Broj: 02-50-1-16-7/07

Sarajevo: 30.7.2007. godine

ZAPISNIK

7. sjednice Doma naroda

**Parlamentarne skupštine Bosne i Hercegovine,
održane 30. jula 2007.godine**

Sjednica je počela u 11,45 sati.

Sjednicom je predsjedavao Ilija Filipović, predsjedavajući Doma naroda Parlamentarne skupštine Bosne i Hercegovine.

Sjednici je prisustvovalo 13 delegata.

Delegati Branko Zrno i Rudo Vidović opravdali su izostanak.

Osim delegata, na sjednici Doma naroda bili su predstavnici međunarodnih organizacija i sredstava javnog informiranja.

Na sjednici je usvojen sljedeći izmijenjeni i dopunjeni

DNEVNI RED

1. Odgovori na delegatska pitanja i delegatska pitanja;
2. Zahtjev Vijeća ministara BiH za razmatranje Prijedloga zakona o sportu u BiH po skraćenom postupku, u skladu s članom 121. Poslovnika Doma naroda (primjena novog poslovnika);
3. Prijedlog okvirnog zakona o srednjem stručnom obrazovanju i obuci u Bosni i Hercegovini; prvo čitanje – predlagač: Vijeće ministara BiH (primjena novog poslovnika);
4. Prijedlog zakona o izmjeni Zakona o administrativnim taksama; prvo čitanje – predlagač: Vijeće ministara BiH (primjena novog poslovnika);
5. Prijedlog zakona o izmjenama i dopunama Zakona o izmirenju obaveza po osnovu računa stare devizne štednje, prvo čitanje (primjena starog poslovnika) – predlagač: Predstavnički dom;
6. Prijedlog zakona o izmjenama i dopunama Zakona o izmirenju obaveza po osnovu računa stare devizne štednje; prvo čitanje – predlagač: Vijeće ministara BiH (primjena novog poslovnika);
7. Prijedlog zakona o izmjenama i dopunama Zakona o parničnom postupku pred Sudom BiH; prvo čitanje – predlagač: Vijeće ministara BiH (primjena novog poslovnika);
8. Prijedlog zakona o izmjeni Zakona o konkurenciji BiH; prvo čitanje – predlagač: Predstavnički dom (primjena novog poslovnika);
9. Prijedlog zakona o dopunama Zakona o industrijskom vlasništvu u BiH; prvo čitanje – predlagač: Predstavnički dom (primjena novog poslovnika);
10. Prijedlog zakona o izmjenama i dopunama Zakona o koncesijama BiH; prvo čitanje – predlagač: Predstavnički dom (primjena novog poslovnika);

11. Prijedlog zakona o dopunama Zakona BiH o izvršenju krivičnih sankcija, pritvora i drugih mjera; prvo čitanje – predlađač: delegat Slobodan Šaraba BiH (primjena novog poslovnika);
12. Prijedlog zakona o visokom obrazovanju u Bosni i Hercegovini; prvo čitanje – predlađač: Vijeće ministara BiH (primjena starog poslovnika);
13. Davanje saglasnosti za ratifikaciju Drugog dodatnog protokola uz Evropsku konvenciju o pravnoj pomoći; predlađač: Predsjedništvo BiH;
14. Davanje saglasnosti za ratifikaciju Sporazuma između BiH i Ujedinjenih Arapskih Emirata o izbjegavanju dvostrukog oporezivanja u odnosu na poreze na dohodak i imovinu; predlađač: Predsjedništvo BiH;
15. Davanje saglasnosti za ratifikaciju Kreditnog sporazuma između BiH, koju zastupa Ministarstvo finansija i trezora BiH, i Bank Austria Creditanstalt Ag – Projekat vodosnabdijevanja Brčko Distrikta BiH; predlađač: Predsjedništvo BiH;
16. Davanje saglasnosti za ratifikaciju Kreditnog sporazuma između BiH i OPEK Fonda za međunarodni razvoj - Projekat sarajevske zaobilaznice; predlađač: Predsjedništvo BiH;
17. Davanje saglasnosti za ratifikaciju Ugovora o socijalnom osiguranju između BiH i Kraljevine Belgije; predlađač: Predsjedništvo BiH;
18. Davanje saglasnosti za ratifikaciju Ugovora o pomorstvu između Vijeća ministara BiH i Vlade Republike Turske; predlađač: Predsjedništvo BiH;
19. Davanje saglasnosti za ratifikaciju Kreditnog sporazuma između BiH, koju zastupa Ministarstvo finansija i trezora BiH, i Bank Austria Creditanstalt Ag – Projekat vodovodnog i kanalizacionog sistema u Općini Gradiška; predlađač: Predsjedništvo BiH.

Ad-1. Odgovori na delegatska pitanja i delegatska pitanja

Odgovore na dva delegatska pitanja, postavljena na 5. sjednici Doma naroda, dobio je Ivo Miro Jović.

Delegat se izjasnio da nije zadovoljan odgovorima.

Delegat Dušanka Majkić je, nakon negodovanja zbog nedobivanja odgovora na do sada postavljena delegatska pitanja uz sugestiju da Kolegij Doma naroda održi sastanak na kojem bi se odredili rokovi za dostavljanje odgovora na delegatska pitanja, postavila sljedeće pitanje Vijeću ministara BiH:

Obrazloženje:

Komisiji za ispitivanje istine o stradanjima Srba, Hrvata, Bošnjaka, Jevreja i ostalih u Sarajevu od 1992. do 1995. je, 30.6.2007., praktično istekao jednogodišnji mandat, a da nisu postignuti nikakvi rezultati.

Kao što je poznato, članovi ove komisije ne rade od decembra prošle godine, kada su se javile nesuglasice zbog teme istraživanja, odnosno da li će se komisija baviti isključivo ljudskim ili ljudskim i materijalnim štetama nastalim tokom rata u Sarajevu. Za dosadašnji nerad, članovi ove komisije, od kojih se mnogo očekivalo, naplatili su iz budžeta ove zemlje 115.000 KM.

Pitanje:

Kada će se ova tema naći na sjednici Vijeća ministara BiH, odnosno kada će Vijeće ministara BiH donijeti odgovarajuće odluke kojima će rad ove komisije biti deblokiran?

Povodom rasprave o nedostavljanju odgovora na delegatska pitanja, Dom naroda jednoglasno je usvojio sljedeći zaključak:

Zadužuje se Sekretarijat Parlamentarne skupštine BiH da izradi specifikaciju do sada postavljenih delegatskih pitanja na koja nisu dobijeni odgovori, kako bi Kolegij Doma naroda mogao obaviti razgovor s predsjedavajućim Vijeća ministara BiH, s ciljem prevazilaženja problema u vezi sa nedostavljanjem odgovora na delegatska pitanja.

Delegat Slobodan Šaraba postavio je sljedeće pitanje Ministarstvu komunikacija i prometa BiH:

Obrazloženje:

U BiH su u posljednjih 10-ak dana uništene hiljade hektara šume i pričinjene materijalne štete. Očito je da je ovom pitanju i načinu njegovog rješavanja u budućnosti potrebno posvetiti daleko veću pažnju kako bi se spriječile katastrofalne posljedice.

Pitanje:

Da li u Ministarstvu već sada postoji plan i namjera za kupovinu savremenih aviona namijenjenih samo za ove potrebe koji bi bili isključivo stacionirani na prostoru potencijalnih žarišta?

Delegat Ilija Filipović postavio je sljedeće pitanje Vijeću ministara BiH:

1. Pitanje se odnosi na istragu koju Tužilaštvo BiH provodi u Ministarstvu unutrašnjih poslova Hercegovačko-neretvanskog kantona. Poznato je da spomenuta istraga traje od 27.10.2005., te da su već prije 15 mjeseci prekršene odredbe Zakona o krivičnom postupku BiH, Ustava BiH i Evropske konvencije o osnovnim ljudskim pravima i slobodama, koje se odnose na dužinu istrage, s obzirom da je našim zakonodavstvom propisano da se istraga po isteku roka od šest mjeseci može samo izuzetno produžiti po zaključku Kolegija Tužilaštva. Istraga u ovom slučaju traje 21 mjesec.

Šta će nadležne institucije Bosne i Hercegovine preduzeti da bi spriječile ove nezakonitosti?

2. Zašto i po čijem nalogu je istraga nakon 15 mjeseci njenog vođenja izuzeta od domaćeg tužioca i predana međunarodnom tužiocu Heikki Wensdorfu, koji je, prema nama dostupnim podacima, sredinom februara ponovo i od početka otvorio cijeli slučaj, ne uvažavajući zakonske odredbe o rokovima trajanja istrage.
3. Hapšenje premijera, ministra unutrašnjih poslova HNK i direktora policije HNK, 22.5.2007., bilo je brutalno, neprimjereno i neopravdano s primjesama miješanja politike, a što je pokazala i odluka Suda BiH, te zato ***pitam ko će snositi posljedice za ovako neprimjereno ponašanje državnih i federalnih institucija i šta je do sada konkretno preduzelo Vijeće ministara BiH i Visoko sudsko i tužilačko vijeće BiH, odnosno koje će mjere nadležne institucije Bosne i Hercegovine preduzeti da bi spriječile kršenje ljudskih prava u ovom slučaju?***

Delegat Ivo Miro Jović postavio je sljedeće pitanje Vijeću ministara BiH i Vladi FBiH:

Obrazloženje:

Trenutno se u Bosni i Hercegovini grade ili su izvršene pripreme za gradnju autoputeva koji povezuju Banju Luku s autoputevima u Republici Hrvatskoj, Tuzlu – Sarajevo – Zenicu, a izgledno je i stavljanje u prioritet gradnje na relaciji Lašva – Travnik – Donji Vakuf. Međutim, grad Mostar, kao kulturno i prometno središte južnog dijela Bosne i Hercegovine ne spominje se u mogućoj gradnji autoputa Mostar – autoputa u Dalmaciji, Republika Hrvatska.

Pitanje:

Da li ima izgleda i kada bi se mogao graditi ovoj autoput kao i dio Koridora Vc?

Ad-2. Zahtjev Vijeća ministara BiH za razmatranje Prijedloga zakona o sportu u BiH po skraćenom postupku, u skladu s članom 121. Poslovnika Doma naroda (primjena novog poslovnika)

U raspravi o ovoj tački dnevnog reda učestvovala je Dušanka Majkić.

Dom naroda jednoglasno je usvojio zahtjev Vijeća ministara BiH za razmatranje Prijedloga zakona o sportu u BiH po skraćenom postupku, u skladu s članom 121. Poslovnika Doma naroda.

Ad-3. Prijedlog okvirnog zakona o srednjem stručnom obrazovanju i obuci u Bosni i Hercegovini; prvo čitanje – predlagač: Vijeće ministara BiH (primjena novog poslovnika)

U raspravi o ovoj tački dnevnog reda učestvovala je Dušanka Majkić.

Dom naroda jednoglasno je usvojio u prvom čitanju Prijedlog okvirnog zakona o srednjem stručnom obrazovanju i obuci u Bosni i Hercegovini.

Ad-4. Prijedlog zakona o izmjeni Zakona o administrativnim taksama; prvo čitanje – predlagač: Vijeće ministara BiH (primjena novog poslovnika)

U raspravi o ovoj tački dnevnog reda učestvovala je Dušanka Majkić.

Dom naroda jednoglasno je usvojio u prvom čitanju Prijedlog zakona o izmjeni Zakona o administrativnim taksama.

Ad-5. Prijedlog zakona o izmjenama i dopunama Zakon o izmirenju obaveza po osnovu računa stare devizne štednje, prvo čitanje (primjena starog poslovnika) – predlagač: Predstavnički dom

U raspravi o ovoj tački dnevnog reda učestvovali su: Dušanka Majkić, Božo Rajić, predstavnik predlagača, Fuad Kasumović i Adem Ibrahimpašić.

Dom naroda nije usvojio Prijedlog zakona o izmjenama i dopunama Zakona o izmirenju obaveza po osnovu računa stare devizne štednje, čiji je predlagač Predstavnički dom. Dom naroda usvojio je sljedeći zaključak:

„Obavezuje se Vijeće ministara BiH da osnuje radno tijelo koje će riješiti preostala pitanja iz Zapisnika sa sastanka Radne grupe o pitanju stare devizne štednje, održanog 9. i 10. 7.2007.godine, broj: 07-50-II-512-16/07, od 10.7.2007. godine.

U radno tijelo iz stava 1. ovog zaključka treba imenovati sljedeće predstavnike udruženja štediša, i to:

1. Svetozara Nišića, iz Udruženja građana za povrat stare devizne štednje u BiH i dijaspori;
2. Amilu Omersoftić, iz Udruženja za zaštitu deviznih štediša u BiH;
3. fra Gabrijela Mioča iz Udruga vlasnika stare devizne štednje u FBiH.”

Ad-6. Prijedlog zakona o izmjenama i dopunama Zakona o izmirenju obaveza po osnovu računa stare devizne štednje; prvo čitanje – predlagač: Vijeće ministara BiH (primjena novog poslovnika)

U raspravi o ovoj tački dnevnog reda učestvovali su: Dušanka Majkić, Adem Ibrahimpašić, Božo Rajić, Ivo Miro Jović i Zoran Koprivica.

Dom naroda jednoglasno je usvojio u prvom čitanju Prijedlog zakona o izmjenama i dopunama Zakona o izmirenju obaveza po osnovu računa stare devizne štednje čiji je predlagač Vijeće ministara BiH.

Ad-7. Prijedlog zakona o izmjenama i dopunama Zakona o parničnom postupku pred Sudom BiH; prvo čitanje - predlagač: Vijeće ministara BiH (primjena novog poslovnika)

Rasprava o ovoj tački dnevnog reda nije vođena.

Dom naroda usvojio je jednoglasno u prvom čitanju Prijedlog zakona o izmjenama i dopunama Zakona o parničnom postupku pred Sudom BiH.

Ad-8. Prijedlog zakona o izmjeni Zakona o konkurenciji BiH; prvo čitanje – predlagač: Predstavnički dom (primjena novog poslovnika)

Rasprava o ovoj tački dnevnog reda nije vođena.

Dom naroda usvojio je jednoglasno u prvom čitanju Prijedlog zakona o izmjeni Zakona o konkurenciji BiH.

Ad-9. Prijedlog zakona o dopunama Zakona o industrijskom vlasništvu u BiH; prvo čitanje – predlagač: Predstavnički dom (primjena novog poslovnika)

U raspravi o ovoj tački dnevnog reda učestvovala je Dušanka Majkić.

Dom naroda većinom glasova nije usvojio Prijedlog zakona o dopunama Zakona o industrijskom vlasništvu u Bosni i Hercegovini.

Ad- 10. Prijedlog zakona o izmjenama i dopunama Zakona o koncesijama BiH; prvo čitanje – predlagač: Predstavnički dom (primjena novog poslovnika)

U raspravi o ovoj tački dnevnog reda učestvovala je Dušanka Majkić.

Dom naroda većinom glasova nije usvojio Prijedlog zakona o izmjenama i dopunama Zakona o koncesijama BiH.

Ad-11. Prijedlog zakona o dopunama Zakona BiH o izvršenju krivičnih sankcija, pritvora i drugih mjera; prvo čitanje – predlagač: delegat Slobodan Šaraba(primjena novog poslovnika)

U raspravi o ovoj tački dnevnog reda učestvovali su: Slobodan Šaraba, Dušanka Majkić, Hazim Rančić, predstavnik predlagača, Boriša Arnaut, Alma Čolo, Božo Rajić, Adem Ibrahimpašić, Mladen Ivanić i Hilmo Neimarlija.

Dom naroda usvojio je većinom glasova u prvom čitanju Prijedlog zakona o dopunama Zakona BiH o izvršenju krivičnih sankcija, pritvora i drugih mjera, čiji je predlagač delegat Slobodan Šaraba sa sljedećim zaključkom:

“Nalaže se Zajedničkoj komisiji za ljudska prava, prava djeteta, mlade, imigraciju, izbjeglice , azil i etiku Parlamentarne skupštine BiH da detaljno razmotri izvještaj CPT-a i istraži primjere povreda ljudskih prava i osnovnih sloboda u nekim zatvorima u BiH, te o tome sačini izvještaj s prijedlogom mjera i dostavi ga domovima Parlametarne skupštine BiH na razmatranje”.

Ad-12. Prijedlog zakona o visokom obrazovanju u Bosni i Hercegovini; prvo čitanje – predlagač: Vijeće ministara BiH (primjena starog poslovnika)

U raspravi o ovoj tački dnevnog reda učestvovali su: Ivo Miro Jović, Alma Čolo, Sulejman Tihić, Dušanka Majkić, Božo Rajić i Hilmo Neimarlija.

Dom naroda usvojio je većinom glasova u oba čitanja Prijedlog zakona o visokom obrazovanju u Bosni i Hercegovini u identičnom tekstu kao i Predstavnički dom, sa sljedećim zaključkom:

„Dom naroda prihvata Izvještaj Ustavnopravne komisije, s popravkama tehničke prirode Prijedloga zakona, te obavezuje redaktore Zakona da, prije objavljivanja Zakona, izvrše predložene popravke“.

I.

U posljednjem stavu člana 5. Prijedloga zakona riječ "medicine" treba zamijeniti riječima: „medicinske grupe nauka“.

II.

U svim članovima Prijedloga zakona o visokom obrazovanju u BiH, pri konačnoj redakciji teksta, riječi: „entiteti“, „oba entitetska ministarstva nadležna za obrazovanje“, „obrazovne vlasti u entitetima“ i druge, koje upućuju na oba entiteta, zamijeniti riječima: „Republika Srpska“, „Ministarstvo Republike Srpske i kantonalna ministarstva i Brčko Distrikta BiH“ u odgovarajućem padežnom obliku“.

Ad- 13. - 19. Davanje saglasnosti za ratifikaciju sporazuma i ugovora

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju svih sporazuma i ugovora iz ovih tačaka dnevnog reda.

Sjednica je završena u 15,20 sati.

Sastavni dio ovog zapisnika je neautorizirani transkript 7. sjednice Doma naroda.

v.d. SEKRETAR
DOMA NARODA
Aljoša Čampara, s.r.

PREDSJEDAVAJUĆI
DOMA NARODA
Ilija Filipović, dipl.iur., s.r.